

喙

鳴

文

集

鳴文集卷二目錄

贈序

唐見甫節推擢司勳序

再贈唐司勳序

三贈唐司勳序

黎別駕考績序

定海汪爾通明府考績序

郡侯張原正考績序

再贈張侯考績序

張侯副蜀臬序

郡侯吳季騶入覲序

定海時汝健明府最三年序

開府浙江常中丞序

華邑侯考績序

良鄉令王君膺獎序

薊州黃判官序

陳表兄赴鄧西簿序

萬汝唯舍人考績序

陸鴻臚序

送杜伯理序

送沈幼真序

趙氏節孝序

壽目峰先生序

張太僕序

喙鳴文集卷二

四明 沈一貫肩吾 著

贈序

贈唐見甫節推擢司勳序

始安唐君丙戌選人也余為少宰望見之脩雅有
度亭亭鸞鵠表蓋不任其恭桑之計願煦溫而生
殖之借理吾郡君未嘗有所考立獨亭疑務反舉
典憲從事不以噍呵窮究為名篤于自然又時引
經義緣飾之身坐于強圉而縱韋于惇稚子奏當

之成監使者謂老吏弗若即它旁郡或簿責無狀
失當直指移屬于君于是浙東西輶跡之所暨如
日焉歷三歲所方報績于考功而郵來以司勲徵
甚矣天官之急得賢又私急賢于其曹也今世為
理若令者不五載不能為諫官臺御史而此獨先
期又含香諸郎之右柄作人之事天官之求其屬
與制選者之求其僚也豈異余嚮之求其理哉國
家之敘百職也各材其長不必周踐而級歷之獨
天官之屬有異自始為司勲政十二遷而為銓大

夫蓋諸曹以事銓部以人人者本而事者末人未
易知也又均調其所自產方求一人以充廣氣類
而博耳目曹十有四人遍五方之樂人以十有四
人徵天下千萬樂人故天下無留良亦無竊吹使
官于是者悉知其職靡所漏遺勢無所瀆其牒黠
無所舞其智朝夕而游焉俛有諮仰有諷寧惟君
子小人白黑蒼黃雖剛柔燥濕銖兩重輕若遍內
人之腹而提其肺肝于是振潔滌汙斧朽鋸瑕無
粹白之狐而有粹白之裘衡者之自操平也劉劭

等官人之法要以平淡為主譬之匠焉平者圓方
崇庠之始也譬之庖焉淡者醎酸辛苦之始也平
淡誠難矣唐君持獄平無難平天下哉

再贈唐司勳序

夫天官以藻鑑人倫為業百司之一職也而古稱
均四海不泰重乎均難言矣銖稱之兩殆而不得
均兩適之銖爽而不得均均出乎關石之和操關
石宜何如也且不觀夫五質之勝體乎䟽暢者給
于釋結端平者密于因任極時淪而昭灑之䟽暢

者勝徒疏不畜獨暢不審將可與汎序而未可
研幾含精之穆葆德之靈而後天則著論比犧
以味呈味者任幹之材以無味和味者任材之
也以無味任材以材任天下何施而不均故持
有人國家之福也唐侯東髮嫺詞舉桂林一人
南宮意其人宜鑠然耀錐著采莫可嚮邇而顧
可以目相者恂恂德心淵乎其近道也理吾郡
月遊于餘而民不寃茂年而懷黃髮舊齒之略
夫材不肖之有級也與法比何異管九流而平一

之不當如是哉自十年以來偽名偽實乘權勢
輓人蕩陵恣睢任其所欲予奪者天官之職溺
曹起而救之掘鼠捕狐既已逆匿快意而猶乘
不免池魚之殃主者懼僨輓亟引其轡是矣然
追奔者心更內相謾而詛之抉瑕摘釁掩其素
此又昂抑之過也賴夫弼諧者端稍停和安輯
耳而言者尚鑽皮洗垢以詆譎為名高孔子曰
庸不可能也詎不信哉漢東京之季黨事大起
者多見染逮唐之衰至歎去河北賊易朝中黨

王之道無偏無陂平平蕩蕩安黨之能興僭驕
而不可降者惟人心彼有以服其心故也唐侯行
矣無以司勲少無以孤立寡政將逮已惟孤立乃
能正衆而同人心借曰未信操今之所理我者往
足矣為天下何以異治一郡官萬品何以異于得
群情不窺牖見天道矣我張侯之帥其僚以布惠
敷澤于我東海也油油然誠信孚于豚魚豪莫敢
奸而吏無所隱此于氣味適合道義相責望不獨
提衡勲業而已觀其所為索余言重索裝之意匪

卷二
欲搖筆端姑快色愉心也余誠好盡乃復犯前蓋
緇衣之好結于內抑所謂底之如棟恒憂撓而莫
予覆也烏乎惜言

三贈唐司勳序

唐侯遷司勳行余有贈言者再矣乃大將軍幕中
安子輩復請無麥丘老人之智而三言之可乎夫
唐侯職治獄者也今遷又銓計之事也與兵皆無
預而幕中不釋然于行豈報其常德我邪抑冀
其來之澤歟節推雖治獄載使者後車行郡國于

事無所不問兵尤其大者宜其素有撫循恩澤于
若輩也事雖小亦可以觀侯余得而汎論焉夫兵
刑之大者也唐虞之世禮樂二而兵刑一臯陶為
士師而憂蠻夷寇宄也其在天官所統尤大兵亦
其一職唐侯深于律請以律談夫公侯之襲膺也
軍職之選用也夫非盡吏律歟今貂蟬者流耻與
介冑伍嘗云我勲爵非軍職引吏部襲封為證非
也貂蟬實武功爵乃襲封繇吏部吏部不獨文故
也文官不許封公侯矣受封者非武功而誰乃知

吏部本無武事者也故元豐帝謂三代兩漢無文武之別律本於唐唐宜亦然故有三銓分品秩掌選事而元豐祖之以文武兩銓歸吏部左右曹意有謂矣今制天官推督撫會九卿科道五府官司馬推五府及鎮總亦然比年天官推督撫既不及五府而司馬會官亦頗有改易冢宰弗得盡聞何以稱統均焉高皇帝三致意於功令蓋深遠云而豈一以兵事付司馬乎所為廢丞相進冢宰之意安在哉夫兵民雖分相維相制之權胡可廢也

然則選用軍職不當遂屬兵律乎在外中丞部使者無所不問節推從行亦無所不問而顧以天官不周知六部事貶損莫甚今進退武夫非吾事進退制武夫者吾事也海內兢兢惟兵政是虞銓曹將誰諉哉唐侯行矣得吾說而存之所以簡良黜衰銷萌制變正紀定物靖疆息民之道宜何如備澤將無外寧獨諸幕中之賜也

贈黎別駕考績序

海上之郡我為大蓋日域諸夷出入之道亭燧銅

鏹往往某置島嶼間自壬子來諸衛所不足禦益募兵以威之庾廩林立漕旁郡粟以充適民力益竭且遘洊祲而嗷嗷者時挾烽警之重以恐當事可不謂大棘焉我黎侯直治粟也人且謂霹靂手從事趨辦快意矣而侯雅醞藉深沉知大體謂吾民藜藿不飽吾顧復咨嗟之恨不能腹而忍迫之納于隍乎且吏于催徵非情也譬之督井時其涓涓而匏壘之竭矣論者徒恐脫巾之虞而不憂上崩之禍所謂見千里不見目睫稱智乎哉朝夕

拮据焉與其長躬析籌而算粟若算珠玉然謂士卒苟無饑而已以待有秋一雨一雪輒外以號乎兵內以號乎民曰幸矣天不棄吾赤子也活有日矣俾居者樂輸于官而行者無譁于伍也其用心如此夫皮毛之傳也脣齒之衛也將苛轡非藝收責為政乎既不可將箱馬而責之馳空卷而責之關乎又不可若為其兩莛之也軍法曰千里餽糧士有饑色猶餽之也將使之捋腹而戰鼠雀之肉足食乎余嘗覽漢循吏傳若黃霸無赫赫之譽而

天子至賜車蓋黃金下詔褒獎霸之政雖鷄豚穀
馬米鹽煩碎罔不精力某所大木某亭猪子皆章
章口具為倉卒用若老督之理家宿更之耨田無
遺策也噸笑敝袴可以代金繒竹頭木屑可以當
楮棹美言可以市拊循可以比挾纊存乎其人而
已於是二三見大夫張公滋滋大旱霖也龍公擊
水簪也而侯與今司勲斟酌元氣剡剡揚靈者也
鹹酸相和而民飫其賜宜哉侯與司勲皆八桂產
而冲情淵抱亦相若毋亦都嶠勾漏之秀與 上

注意太平而精流于節屋既徵我司勲持水鑑往
矣侯之績適成我知其無憂九閭矣

贈定海汪爾通明府考績序

善夫眉山公之言也曰非用兵決勝之難而養兵
不用難夫兵者聚天下不義之徒授之以不仁之
器而教之以殺人之事天下有事則不義之徒為
義用不仁之器為仁用而殺人所以安人及夫盜
賊既殄四隅既靜彼其畜智而無所洩懷技而無
所施于是不仁不義殺人之事憤積而四發譬虎

豹終日檻則跳梁大呼以發其怒蝮蝎不螫則噬
噬草木以致其毒不有聖人固無以善其後也近
世涼州趙中丞知兵人也其言曰自漢唐之世未
有屯大衆而不戰者王恢首尾馬邑三月耳猶坐
費無所得孝文三將軍兵月餘而解其餘久屯大
衆者必征討久屯大衆而不用以至于自困宋其
萬世之殷鑒乎余每誦兩公言輒髮泚泚然上立
蓋余亦嘗有二言其一曰養兵畜衆所以為盜也
異日者獨患盜耳今置盜弗患而移其患于兵曹

親而伍譁則司馬恒挈挈然防之其一曰張官置
吏所以為民也異日者獨患民耳今置民不患而
移其患于官曹起而黨譁則太宰恒挈挈然防之
嗟夫本末衡決循此道不改寧知其攸濟哉定海
之為邑也不能中上太宰嘗易之以科貢來比使
者言非進士不可於是以進士來而來者又未能
席於是吾汪侯以諸暨才調矣夫一定海耳徃以
科貢有餘今進士厯厯焉豈非宿大兵重地哉汪
侯未來則定海難汪侯既來則定海易然則難在

定海而易在汪侯也顧天下安得盡如汪侯者來
乎且考績矣能久不徵擢獨為吾定海乎此吾所
為國家憂不細者也古稱將相和則士豫附夫為
天下者若是平吾心以為國則文武吏如一體平
吾心以為人則兵民皆赤子安所置低昂其間而
貽當事之憂若汪侯其人矣惟汪侯之善不止此
歲大旱則露禱自責有龍雩之應大侵民并日而
食則勸分出積簡獄已責通海市之舶招四方粟
潤于鄰境戢鷹鷂之翼揚鸞鳳之聲身師帥之嚴

無父母之適飲冰食檠以倡諸僚諸僚化之而室人不能謫皆其大者然循吏之所同也如嚮者定海之所獨也余故表而出之以著汪侯且覬當事者有以釋國家之憂也

贈郡侯張原正考績序

沈子曰劬哉張公之為政也何稱三年九載弗與易焉天降禍有衆以螟螣飢旱雨雹之災毒我公焦勞以夜視嚮之人勞逸不可以算戊子前余亦大有年一不稔而民輒叫號沕沕幾揭竿起夫何

億之疾也比已丑再沴更三吳江淮荆湘間赤地
萬里人枕籍死而我晏然忘饑今穀日出價日減
市有京坻之廩又何其宜億而不億也於是乎計
然詘而白圭子贛窮矣吾聞之善生者天時不能
使之困地利不能使之瘠操短長之策而造化入
其數殆公之謂乎負海波之利而憂民之不養哉
昔管氏用牧民山高乘馬輕重九府不戰而正諸
侯伊尹善通移決塞高下疾徐之策故湯以七十
里有餘在壤數澤農之國故不勝山農之國也澤

農淤沃畝一鍾穀多而不愛轉徙之所集無棄餘
之歲山農之國瘠磽寡收畝不能石而愛之若珍
轉徙必待羸馬車輿負輓之勞賈不償費故多歲
非至凶厚利不出今之時山農之時也括蒼永嘉
天台之間有十年之積而大海可汎也金刀吾之
所不恡穀粟彼所有餘以不恡待有餘始猶紹而
通之久則估自至價自下而又時其泄越筦鑰于
澤吏之口貴則畜令而留之賤則靡令而通之於
是大豪富家又不得侮奪吾氓而國中之積併出

鉅惟朝夕是賴即春以奉耕夏以奉耘耒耜器械
種饌之費畢取贍于茲公之活我顧不鉅且厚哉
管子曰以室廡籍謂之毀成以六畜籍謂之止生
以田畝籍謂之禁耕以正人籍謂之離情以正戶
籍謂之養羸而或者語公以履畝察戶勸分出墾
為事公曰是徒愕吾衆而益之病不可則公之意
念深公既務權脩矣而復為之脩津梁便關廛察
市官計委量輸之以財而復為之通魚鮓出鹽鹵
利陂溝勉稼穡導之以利而復為之脩水政潰溝

渠戒火備具綆缶納之以寧而復為之恭百神敬
雩禱徧山川發祥氣予之以和而復為之緩征歛
理刑罰恤鰥寡弔禍喪澤之以恩而又為之明紀
法肅政刑厚庠校敦禮信匡之以義如鳥之覆子
無聲無形而惟見其成富在趨時不在歲司羽鳩
政在自成不在鷹鷂擊擊公之謂也余謂公似子
產子產衆人之母也而不以禮法假人凜乎不可
犯鄭自莊公之後無歲不被兵而子產輯之以禮
強宗大族弗順而子產定之以正不獨其養民惠

使民義也我 章皇帝為臣鑒以訓在位子產稱
首若子產者顧不偉然名世君子哉余以是期公
千百歲之業矣

再贈張侯考績序

吳郡張公守我三年郡士民願以里謳巷吟聞之
闕下而不佞既載筆已而鎮海諸將士亦乞文不
佞笑謂君曹之禮亦唯問之以弓焉取吾毛穎效
之超距之暇以其力善事主帥足矣何與吾龔黃
理有應者曰固也吾儔直以戎圖請自吾儔從事

予軍惟左鞭弭右橐鞬介而揖大帥節下毋他事
時時泛舫皇索鯨鯢大海中波濤靜無所得則解
鞬收纓郊射以嬉蒼頭軍亦偃馬卧而貰酒取從
軍行度以越聲樂矣以為盡國家威德紛綸赫煜
於東南際天之壤乎我曩歲之饑小民實蠢焉積
其嗷嗷之聲以聞伏戎于莽吾儔不憂警燠而憂
揭竿誰實勞來安集之也大庾小庾公私廩廩以
乳民則虞脫巾以哺士則虞佩犢委曲調劑剖半
菽之積與士民共之誰實綱紀之也吾無馳羽無

譁伍而吾儔得有其彫甲鈍戈木譙虎落校聯不
絕使無夷于草萊而吾儔得有其居壘采薇出車
之章交于耳哀勞之聲徹于骨髓零漉青雲以覆
蔭塗泥使無夷于下隸而吾儔得以有其比耦惟
是湛澌濛涌旁達中外者則田畯紅女能孺慕而
途咏之其保大定功無乏兵圖而鳩其民則吾儔
辱執事之顏行寔衣被焉而懼載筆者未之遑及
也吾敢枚焉而已乎毋亦令守在關塞者丐其餘
豈其縉紳士獨承明德也不佞曰余守史局時好

方言常珥筆從計偕問之輜軒使者未嘗不歎夫
人傑之生與其土宜地方并行而交流也漢時惟
齊冠帶天下三服官與煮海之利饒故齊稱十二
而山以東徃徃以相業聞今天地文明之氣蜿蜒
于三江之湄而士生其間又厚取而博收之以弘
其身其居者用土地之膏以澤其心而高其志文
亦稍勝焉其出為鉅工宏士握乾綱振坤絃鵲起
而龍翥身任天下之重者比比也夫三江之湄非
今所稱山以東乎漢法治郡高等者入為九卿至

宰相其得人無如地節五鳳其人則無如次公弱
翁弱翁沾沾真宣帝臣次公之才信于治郡而詘
于為相亦稱其為漢循良也今縣官以異等求天
下士虛八座以待而公皇皇乎鴻施鉅伐發三吳
之精英凌弱翁轢次公所張設蓋廣以遠諸將軍
之德公也僅以其戎圖也毋亦以其蠹游于大浸
之中哉

贈張侯副蜀臬序

漢之人以儒術緣飾吏治知吏治乎哉今之人言

我國家尚吏知國尚乎哉往代之登士也雜或以地或以詞甚以訾起故有假儒之重為名高若縑襲領采賁質集異物而成稱緣飾也宜今之仕無弗儒也曷有不誦法孔子是勇于奮擊而不難以衿脩節制者也雖驍獷不可使者無逞其豪矣雖游閒輕佻戢戢交手而從事矣竭精畢智于六經之言尚恐不中程而緣飾我可以博一吏乎藉令國家以儒求之而以吏望之是明收而明棄之吾是知高皇帝意不然也然猶謂國家尚吏也則

自儒之散始散儒者常以慈惠弗忍為事一語文
比法守見謂之申韓一語錢穀貨賄見謂之管商
一語委圖竒中見謂之蘇秦縱橫寧弛毋諠寧濡
毋奮寧含疾保瑕毋抓垢剔瘍寧優優養名毋赫
赫見功故紀綱日廢于上而不察風俗日靡于下
而不問吏然乎哉亦非儒之所宜有也儒之不通
為儒而詆吏非儒比受事則患儒之不適盡去而
師吏本末衡決首尾乖刺不達國體而更號國家
之尚吏也謬矣張侯言國之大衡不可一日借人

也為惠于法之內則虎變為狗而上下共為政無
所不分而無所不畏權坐而見奪矣何以令民為
威于法之外則爪牙用事民重足立若伏鷲若乳
虎威亦褻而不行所稱吏難者不在是邪張公之
來行法不避於是民始知朝廷尊期而政成則觀
上下輯睦無煩乃公重為也時有所縱舍曰皆吾
人也安得媚氏豪而汙人蕭斧哉然人猶凜凜神
明之盜賊不興訟者必以情奉令承教惟恐後之
顧金錢關說者噤不行如領振裔如臂使指罔敢

嘗試以干上然後曩之積靡顧化故曰法者民之
隄防也隄防潰而有停水否矣其再朝京師也積
五載所矣民固知張公當遷不來猶娟娟望之庶
復借一日乎否亦藩我臬我以波濶我乎而驛來
以蜀臬行民用憮然其僚黎侯安侯張侯詣沈子
沈子曰夫海上頃有島夷耗動搖民心誠得貞幹
吏填撫之甚幸衆儀張公而公不來也主銓者豈
謂蜀險哉虜關其北境獠嚙其南末而地僻遠吏
豚尤無忌微公孰可使者何則公儒吏也儒吏之

為人國也知大體譬之射挽強決拾審固而後發
譬之御不範馳驅不行非偷一切取辦而已肯任
其縱廢陵夷不為國事事矧手控縱自我哉聞言
有一地而寬嚴異者包希仁歐陽永叔之治開封
是已一人而寬嚴異者柳諭蒙之治京兆河南是
已一人一地而寬嚴異者張復之之治蜀是已吾
知張公之為張復之後也若乃大衡之不可借雖
時寬時嚴終不易也張公曩對大廷主者嘗進讀
于上前此固聲聲儒者吏於何有於是二侯以余

為知言而張侯又蜀人也喜其得天請書而貽之

贈寧波郡侯吳季駒入覲序

制郡邑長吏三載入覲于天子大計其所屬於是吾郡季駒吳侯率厥職往余告歸里中而郡父老就余徵言謂郡侯于余有一日雅以異等遴吾率踰歲而績大著大其聲而明揚之宜莫先無以守玄為解余曰吾宜言夫古牧伯以三尺綱紀其封內若布帛之有幅有弗龍警斯懾有弗鞠鞠斯懷宣上之德而周吾之澤命之曰循良也吾比與

論易而契蘇長公之說長公說安土敦乎仁曰
濟天下者必待于積使物各安其土而後厚之以
仁如因耕因鑿而食之衣之然後愛可廣一手一
足安能無窮侯以為知言夫綱紀者亦百姓之土
而操植綱紀亦長吏之積也綱紀定而後衆心安
下吏乃有遵循而上始得布其仁是故我與人與
吏得交相愛也愛豈不多吾觀侯為人閑達而脩
理遇事感槩酌機緩急而斷之無屑屑之細迹務
循循之至舉是人吏之周也郡總邑之成邑治則

郡事究矣以余所睹五邑士安于庠農力于田而
商旅熙穰于市誰非侯安土耶蓋侯守法如其官
守官如其身語無滂貌無詭而民見威清白自表
不以市廛之入費民鏹而民見廉豈無因革損益
盡與時宜之無滋弊孔而民見達古所稱循良曷
加焉聲之入人也不踰數武升高而揚徽于數里
所托殊也郡之臨于邑也即無法不行乎然非德
音孔昭式化必不捷余以知侯所托高余又以知
侯之屬所托高故自侯在事天宇加朗土脉加豐

而民物殷阜以是報 天子稱上最何忝哉二三
子黷然笑顧謂天曹當大擢侯吾儕安得久侯夫
既徼天幸以有侯矣安所無餘波無暇遠引如建
溪鄒公三遷不出吾鄉已事可徵也吾將采游童
之歡謠第列士之嘉誦紀侯他日若今日鉤輅也
何紀焉

定海時汝健明府最三年序

百里之難自古以固然雖然按已視成循曹襲署
章程布矣條貫具矣徐與民信守之三年而會其

成猶易也若夫歷涉多方東西靡常寄治于行幕
容與條秩試輒收竒我未之前聞善藝者必有恒
器舍其器而操人之器輪扁猶兀兀焉弦不習不
成聲事理然也且一令也而衝緩疲樂劇易豐儉
異若懸宇操一術而施之是膠指南之車而求通
于南北也如時侯之為政不然時侯書三年績也
合其為確山長興諸暨與今定海四邑者而成牘
牘繁而不勝舉其所承事諸使者不知幾人而一
辭以為賢語大凡曰脩潔曰精勤曰敏練曰端詳

指事而稱曰抑豪強曰剪蠹弊曰節財用曰去煩苛曰卹困窮曰肅胥吏而約之則曰實心實政任怨任勞云時侯之成進士癸未也到於今蓋九年所矣而甫一考蓋銓者已三目而三優之矣與時侯同時者多去為顯官知侯深矣此庸牘而後賢哉海內惟中土易理確山之政亦猶行古之道也長興天下財賦數徵輸兢兢焉繭絲易保障難而侯亦上上豈催科之獨工蓋民爭負擔驅牛車而來稅何乏之有諸暨居萬山中山中人樸鄙而此

獨不訟牒時集斯亦未可卧而治也至于定海而後信令難是我孱邑也而有千乘之賦鋒鋌鍛十于襪襖鬭爭獄訟百于櫪藜右彼非所以安此不右彼亦非所以安此長得一心人推轂而御之而後可以無憂斯意又在簿書筐篋戶口農桑外哉因俗而善應偶世而增奇取天下事蠶緯于胸中縷而出之焚如而不竭其孰能與于此世徒議久任謂久任則吏民安政俗比而奸不生使盡得如時侯者用之何必久任若渴者之飲大川汨而

悅矣

開府浙江常中丞序

余謂世曷嘗有奇功異勲自夫守一局一官之節
抱咫尺之行苟免一時之文責者委時而養安則
賢者始擅其稱士于天地皆分內而未嘗有奇也
目視而耳聽手持而足行職也卒有蜂蟄手足耳
目不期會而相搏拊一家亦然尊卑內外秩然大
在其突則叫呼奔走四出而抹之不為失序也蓋
之仕天下亦如蟻處繭絲而人能肩之可曰非吾

事若痼疾而憂懣指而危猶泄泄然以越局辭是
父子夫婦坐視其災而耳目手足忍其身之螫也
朔方之變群不逞驚然頸大吏授甲登陴媾虜而
內圖談者尚曰徐徐使天下武夫悍卒生心亡元
之轍不遠否則若晚唐諸鎮獨士卒為政耳天
子赫然解佩劍授閫外于是天下曉然知天之意
無赦而猶莫堅決何哉積無事之餘苟一旦僥天
功養安偷生之態牢而效身報主之義微也當是
時上書奮而自效者獨分陝葉公奮而助以戈者

獨我常公於是 朝廷命李都督梅御史帥師會
葉公朱公於靈州我常公遣楊叅將以三千甲赴
之圍既合激水灌其城城圯遂大入賊窘相屠就
縛而後 上釋宵旰之憂露布來我浙士大夫豈
常公之功余獨嘉其忠方遣兵時人謂常公不誅
浙而謀天下余謂安天下何有于浙往四十年前
浙于天下稱脆島夷來所至無不鮪藉乃徵兵寧
天下天下兵亦復鮪藉而後浙兵奮島夷殲其後
譚尚書臧都督受命防薊曰我思用浙兵而浙兵

以勝聞今討朔方以浙兵防遼及天津以浙兵防
淮又以浙兵於是浙兵銳然莫強而齊之技擊魏
之武卒秦之銳士下矣夫天下勝兵所在也尚誰
之敢窺此常公之張吾軍也項羽起會稽以八千
猶江東也勾踐入吳與齊晉諸侯會于徐州致貢
于周則浙兵夫兵何常在所振之善謀者謀之于
堂上而折衝于樽俎之間余鄉先生陳公大章舊
公僚也謂余曰始吾嘗謂常公偉丈夫今果然余
曰忠矣不偉何待

贈華邑侯考績序

侯吾邑者于古稱王臨川計臨川時不能如今劇
蓋是時人文未盡開士大夫之青紫而游者鮮也
甲兵不試民無供億轉輸之勞上無催徵敲朴之
繁也彈琴而頌聲作矣說者謂臨川于鄞試青苗
焉有如試青苗于今之鄞而耳目之者不曰令與
民市乎即文法古今亦懸寓矣余嘗讀劉穆之傳
謂穆之目覽詞訟手答牋書耳行聽受口並酬應
不相叅涉悉皆贍舉夫世固無若人也育之亦未

奇也惟所酬應咸中窾不失人無後言而始奇不知穆之能一一窾否也雖在王朝六卿分職而治合六職之事而萃之一躬者其令乎而况當其劇邑吏從旁而睨人持牒而求日不知幾非明鏡必疲於照矣非勁衛必殆於稱矣若我華公之治鄆也可異焉其敏練于錢穀老瘠不如其停審于訟獄老胥不如其明燭于情變老更不如而其持平守清澹如流水繇爽塏暨湫湄自高門逮賤旅咸秩得宜不疑滯于物即老胥宿達閱天下之義理

多者弗如夫前三物猶吏事也辨固難矣而加之
以清平知化委蛇委蛇此其中之可受也不可
吏事槩矣夫臨淵揆水淺深難察然習者鏡其波
而度其濶尺鱗神鯢之蟠不必沒而辨也臨川之
名滿天地而明者獨見其微則預于鄞揆之將無
其好異見竒素與人情違邪我既有華侯矣臨川
何足顧與詰余者曰夫朱紫月旦何容易哉子何
躋侯于臨川曰吾以事實之披簿書決訴牒按章
舉事不足以見侯余所異于侯者登耗十年之戶

只裁量十年之版籍稽勾十年之田賦據凡集議
翰不再染而無後言此儻所謂無宿諾者耶豈若
臨川日夜苦其民而與天下之士大夫鬪乎且侯
三年既若此矣積茲以往力彌闕智彌拓故非尺
度權衡之所料也

良鄉令王君膺獎序

仕莫難於令尤難於畿輔令國家繇發無鉅小旦
夕徵畿輔邑邑多中貴人勢家不可問四夷之貢
使邊庭之將戎往來如織四方軒車觀上國者跡

交于其庭旦夕飭厨傳不少休為令如此可不謂
大難乎然使土富物厚即一切倚辦猶易而良鄉
蕞爾小邑重以繇故其民日寘於他境田汙萊不
治令徒以空印操民上而當前數物者取盈故智
計內困嘉聲外銷無元去矣雖然非難也設敲朴
以御之忍呼號之聲而快已之所欲為民雖貧豈
盡賴尾不任哉夫令若此誠易而君子以為非令
也其有所不忍哉良鄉劉生客于余數言王侯余
曰曷徵曰昭陵之後大司空徵徒乘侯負番鍾以

從者一歲民爭經營焉績最大司空才之移大中
丞受上賞行部繡衣使者出必道良鄉入又過之
必曰若令才獎以數十言書上考余曰民謂侯何
客曰夫民何知一錢之不輸一日之不役然後懽
耳然異日者之政館客多留上官責對簿而事益
勞民益困侯來則館無留賓庭無嘖言官無廢事
而民亦無病力此侯功邪遇合邪將今 天子善
治於上而百司飭勵莫敢奸吾民邪余以是重侯
侯獲獎而民歡忭如其已得乞吾言張其事此重

進也侯掖人也掖有宿公者嘗為我郡理篤厚廉
明民不忘至於今頃余侍同朝比部稱平念其母
授簪以去此可謂卓行君子矣夫掖多賢哉

薊州黃判官序

吾鄴黃氏之世自欣飛始欣飛者梁乾寧中為欣
飛都副兵馬守明州有保障功歿而祠于鄉者三
裔孫南山先生以理學著其後為西川兵憲公又
後為太守公守谿者太守公子也少有聲譽序間
以賢為太學生萬曆改元授薊州判官將行問政

於沈子沈子曰黃君知古者置民牧何哉夫牧者
德惠和訓彊幹勞民姦宄於是乎平訟獄於是乎
清雖簿書糾紛不敢言勞粒粟絲帛不敢言私此
置牧也黃君又知今之政何如哉天子雖冲年
精勵於上百司奉公行法有過無不及海內循良
銓曹收之不勝鴻臚魚貫恒有滯憂何者多故也
一罹文法棄之若芥比聞官薊州有兩人者其一
人在事頗久其一入尚新兩人者無他過獨以私
騎驛馬為庶者所得比部持文論免所知有力者

救之萬方終不得胥靡旬畝以歸黃君不聞我黃
君祖父皆聞人讀聖人書雖不忍之以害歆之以
利吾知必忠孝不苟焉營世俗之所希也薊去都
朝發而夕至吾屬耳矣鄉人飲黃君于日郊珠璣
盈櫝不如夜光在握醪醕滿腹不若箴砭在目彼
史氏之言善言也請書之

贈陳表兄赴鄖西簿序

余少而讀子虛雲夢之事詼詭幻譎至不能名舉
今人觀而望之若化城之難登迺及覓屈子離騷

其聲悲以長又憐賢人志士之心惘惘乎有餘思
矣士行遊四方孰非事焉特事未定耳借以屈子
之時遊雲夢之渚觸目皆戾何以寄賞心焉安得
任虛舟之適而抵是哉表兄陳長君授鄖西簿過
余余未論簿卑且快長君之有是往也贈詩卒章
云枳棘鄖西樓亦穩木蘭洲畔放歌迴誠豔之云
夫騷人哀怨戚違君而遐投達士曠懷歡與物而
隨往凡所遇者皆非我也而橫生歡戚於其間則
以我遇而未嘗與非我者遇或者顧謂物令人喜

物令人悲不亦淺乎是以君子遊世尊之王公不以榮卑之疏布不為貧不得已而起為吏寧下無上寧卑無尊職近而易稱事淺而可全祿薄而無禍地間而不喧故優游暇豫而無患苦于人間也彼三閭大夫何足顧歟能大者享厚奉功高者處危憂有常職而賜于上曰會計當而已矣牛羊遂而已矣簿書期會吾無失焉聽民之自治勿擾之而已矣而無失吾常此之謂不以物撓神吾將寄吾神與君俱往夫或曰彼鄖居山溪中楚蜀之會

與雲夢相去數十百里子乃是稱非與余矍然曰
非哉余繆矣余繆矣雖然吾以神往雖數萬里可
也子謂我曰陳長君以治人徃子不教之以奇策
要務嘽嘽論其他如畫鸞鳳而命之翀天越人指
途而刺刺道齊鑾正極遵修塗行之事也然長君
世家子襲組帶之遺芳挈朝野之故典更事熟矣
故吾以所聞誦之也

萬汝唯舍人考績序

夫學者莫不有口行乃無徵也發篋探藏取百家

書讀之閱肆辨博譬巨海之出珍奇大嶽之產貞
幹鱗鱗具矣用以譚道術辨國體何莫無口雖然
未也今天下各以其術揣摩大氏陽附聖哲而陰
去之急則河奔浪覆詭辭以服人口直為名高取
世資耳用之終亡效誦讀若此雖窮年何賴焉余
以為性術異變統于中庸小辨破道巧言亂德學
者發憤徃籍師模弘範以究當世之用其必有沉
潛之思寧靜之力而庶乎夫沉潛之思者何也楊
子雲曰神心恍惚經緯萬方天地神明而不測者

也心之潛也猶將測之況於事倫乎人心靜虛動
躁則實實則道無所居神明惡之索之愈急而去
之愈遠故曰待沉潛者夫寧靜之力者何也夫學
者患弗能知知之患弗能行盛氣疾走亦弗能行
故非寧靜無以致遠彼其氣安而神王張弛適而
迹不留也嗟夫世誠得是人而論之故枯竹之字
可覆勃於鼎彛柱下之文亦並叅于席上吾同年
萬汝唯之為中書舍人也三年矣書其績於牒以
報司功曾不能掩尺楮蓋舍人掌綸封之事侍從

出入職大省宜無可書雖其所謂學成而好脩者
淳淳淵淵非吾二三兄弟無稱焉君質行君子也
居省中輒手一編屈首受業若為經生時恂恂未
嘗舍一言操志謹潔約其身如嚴姆之衛閨姝而
不敢慊其所欲為此吾所謂行有徵而不以口有
深潛之思與寧靜之力以成其學者舍人勉乎哉
無何而 天子拜為御史夫御史艱也言論風旨
無所傳聞則為愧有傳聞而無當則尤愧棋置谷
受綺分鱗次虛已以待之養全才而出之不在其

口在其躬也萬君勉乎哉

贈陸鴻臚序

金陵陸氏其先我鄞遷也由鄞而崑山由崑山而金陵蓋高皇帝徙郡國豪傑實京師崑山陸以賢從今三陸鼎趾聞人蟬聯於當世矣曰肖龍者為太學生幾年蔚有譽於公卿今年秋始赴銓以我司成公書來曰陸君待除例當為北鴻臚然陸君不願為北鴻臚惟余心亦儀其南也蓋陸君雅好游士大夫不厭其數來去之輒思故司成公居

南而顧其南顧陸君北則都人士之與游者又顧其北也既陸君謁而南於是都人士歎其去沈子曰夫歎陸君者不以陸君可游哉吾亦歎陸君今士大夫重內而輕外南都雖高皇帝都仕者猶外之也今陸君獨請雖其墳墓親戚不釋之故乎抑紛華之好澹矣鴻臚掌禮儀之辨別四方君長朝覲之等而日盤辟天子之側一趾一語少愆於度白簡隨其後今任職者歲常奪祿之半此猶兢兢者也留都異是獨歲時上食高廟謁園陵

而已日晏起飽食馳車馬過貴人鞠躬後言無失
職已難易豈不百哉而仕者顧右北也嗟夫余安
知南之不為右而北之右邪天之道損有餘而補
不足地之道變盈而流謙自天地不能兩春並燠
常就陰息機而佐其發生萬物嬗化曷有寧極沈
子曰余嘗至金陵覽觀吳晉以來之故慨然歌唐
作者之詞欬噓不已夫其荒原野草感歎悲歌而
不知後五百年之為高皇帝豐鎬也夾道朱樓
御溝垂楊絃歌大雅之聲戶巷不絕雖二陸復起

不能咏况唐人哉於戲盛矣宜陸君不能一日去此也

送杜伯理序

夫士含秀葆靈攬三才之粹居則範鄉黨出則效百職乃今之士壞矣夫民壞法刑之所及士壞則逃其口而匿其身以為禮即不我收耳刑如予何斯國家之大妖也余行游四方大抵山谷之俗龐近野之俗鄙都市之俗狡矣下邑之俗利中都之俗巧大都之俗詐矣邑愈大俗愈薄此猶民也怒

而靡喜而解情可知法可行也壞俗者莫甚于士
尤莫甚于上都之士上都之士戴峨冠躡鮮履翔
翔揖讓逡巡容與誦說先王比於鄒魯而中實不
然赴利如湍奔避難如鼠竄倚衣冠以侮齊民齊
民莫敢問哆譟張以誤儕疇儕疇莫敢詰而且連
朋呼類猥引蠅逐足以奪人之氣星言夙駕把臂
揆腕足以結人之知詭辭柔氣稱託比類足以屈
人之辨甘味美玩投間抵隙足以溺人之智竒禍
惡聲陽投陰阱足以恐人之心轉相師法日甚月

益俗以大壞法以大格曾是而可以弗禁乎余嘗
以為禁之不難誠簡海內鞠躬君子為之師不言
而自喻不威而自懲潛奪其非而亟反其習而略
先幾者以為迂務不足圖也規撫仕者以為庸功
不足建也今日之士不為他日之大夫乎而聽其
傲戾恣睢不以一語相加仕而後繩之不亦晚乎
戊辰成進士余甲在三當除郡縣吏與豐城杜伯
理觀大宗伯政嘗願請為學博苟得行其道即婆
娑卑秩可矣會試館弗果於是乎伯理有味於余

之言請教揚州余嘗游揚州云大江之南五湖之
間其人輕心其賢者濶達多奇節其不肖者好窮
大履隋皇之敗德若吾前所陳者皆有也君何以
教之哉出自東門負郭而俎豆者董生也董生奏
策武帝明天人之際極質文之變一相江都而驕
主為之改容今君辭榮就閒恬然不欲見奇於當
世意念深矣教誨多士孰與相驕主難吾知江都
士之有蛾術也已

送沈幼真序

一貫與其同年友三十人受學於詞林無何幼真
病告幼真曰天不假日於人也學邪憂吾身不學
邪愁吾神吾不得與諸子卒學天也一貫曰凡學
為我而已子處是非師友所能益子去是非師友
所能損子無患去矣且子之學非馳車驟輿爭先
致途引強負重角能見功也病何害學無患病矣
夫學索之愈勤愈不獲獲之不必勤求之愈遠愈
不至至之不必遠殫神敝力而恨不及斯夸父
之喻也舉目見日何近非日而逐日於日豈為得

日凡今命學云者豔其文辭多其記誦考徃代之
憲章極熙朝之法戒無收並采資用代匱如是而
已無益也不惟無益且加損子不見蠶乎縱橫文
理三眠三起就物成形巧莫踰矣吐絲自縛迄盡
而止承以文筐浴以蘭湯制命婦人之手繭成矣
而蠶則亡美盡而質化功在而身畢所與共溫煖
者非蛹氏之族也以斯方之奚不返其性命之常
而招招然觀耳目哉彼向之所謂巧者不既大愚
乎道惡乎在神惡乎存命惡乎入治惡乎出六氣

惡乎和群動惡乎生雕文鏤章祇增重於簡策馳
勲驟績僅垂耀於旂常採榮樹名獨被焜於骸骨
聚徒集友第發喧於堂皇喜學者有以學學非外
也慮吾內之不修非慮外之不至也夫子興浮雲
之歎顏氏享屢空之樂夫屢空為樂何物非樂富
貴浮雲何物非雲萬物盡空也盡浮雲也吾生亦
空浮雲也知空則我大而物小故惟顏氏之子可
以行可以藏而他不與焉吾子方將披塵霧覩大
虛完其耳目含其聰明游於沖和之場放于獨往

之境吾以子學今始也安知病之不為去病奚患也又曰凡吾所為幼真患者盡吾患也吾雖未之及也言則至矣惜乎吾不能除其患而為幼真患也

趙氏節孝序

史一貫曰余觀趙母之事而歎晉下宮之功也大司馬張公志府事載趙母及婦節孝然尚未竟余請得而論之余髫時與趙氏子參魯游嘗過趙先生儼然師事焉趙先生客童子童子何敢當趙先

生禮恭如此父之趙子舉一子客曰趙宗人今鼎
立余問客何以言乃始知趙宗獨先生父子今及
孫而三他無人也由是言之方母居嫠趙宗母子
焚焚耳危哉危哉夫嬰杵曰存趙孤雖艱危猶男
子也今母之存趙孤也而一婦肩之家貧不能給
茹荼攻苦終不以故下堂媿死者又能教其子孫
令致青雲之上鬼復血食此與下宮之功何異故
世之論節者厥品殊方不可無辨家世蟬聯子姓
玉立貲財可以自衛而保有令名婦人之智也感

伉儷之好之死靡佗婦人之仁也畏譏憂說奉身
至沒婦人之忍也命也何言婦人之決也力持門
戶不待男子婦人之健也計宗祏百年絕于一旦
逆遭挫厄存絕繼仁若趙母者婦人之勲也雖攬
貞履義殊塗同歸而事有難易不可槩論嗟嗟趙
母可不謂賢哉假令課節而殿最行焉母當為稱
首然趙氏婦又宜其姑以孝聞有是姑有是婦天
所啟以報母者豈毫髮爽哉乃趙子舉于鄉而趙
先生以貢上天官麟鳳代出為世所知婦姑雖歿

名為茲益彰大令 天子甚嘉操節諸郡國採撫
幽仄以名聞輒下詔官議所以旌異之甚厚若趙
氏婦姑觀風者胡可不採也

壽目峰先生序

目峰先生者趙氏仁為懷寧縣學官到官自免歸
有子舉進士讀中秘書給事中今年先生歲七十
太學博士周君輩以年家子將遣人上觴而給事
君以直諫謫高安且過家寧先生矣沈一貫曰夫
人情何涯哉以好者勝恒人好榮觀取尊顯則樂

已志士矜名名及之則樂不則戚君子脩義義安
則與安義危則與危其殉義必往亦猶小人之於
利也趨之雖蹈水火一不顧誠焦爛濡溺而快然樂
已初給事中屢上疏言事以為言之則心乃暢悅
不則鬱鬱懣懣何暇自得罪既得罪又以為命安
所之微坐法則鬱鬱懣懣人且有陰陽之患豈兩無
失哉或曰彼給事者以無貽其親憂乎應之曰彼
給事者乃服親教者也其親聞之方將忤手謂余
乃今有子奚其憂先生之為人也齋坐而矩行擇

而後言有道君子也身不得其志而親見於其子
豈以珙璧易一忠孝令名貶哉故曰先生樂也初
給事見逐一贊職在史官不可令其事遺逸嘗編
摩本末 今皇帝聖睿好學時游精於筆札嘗大
署文華講讀殿云學二帝三王治天下大經大法
他署尚多萬曆二年署書賜群臣自輔臣六曹之
長大中丞講帷臣皆遍書大盈尺皆四字或兩字
成文文如其官蓋異數也趙給事中參魯竊念
天子富春秋好學如此三五何足道顧古者稱天

子置公卿輔弼之臣臣等職在弼違 陛下豈以
小臣不足辱貶敢昧死請蓋意在規箴云章上不
報會趙給事復諫祠碧霞之神滋不悅中人申信
者居守南京也橫其黨掎刺恣甚給事中王顥有
事禁中中人挾私忿操筆逐之事聞闕下信稱病
免還薄罰其黨而已趙給事抗疏謂此曹亂政不
一大懲創則朝廷不清且信既以罪徵不宜復入
侍左右中人見其疏大懼環泣于 上搆給事
上不得已且令給事之高安頃且召之人言給事

之左自乞書始或曰不然夫既以怒中人矣禍必有發昔劉洎為文皇帝輔太子留守定州至簡注也洎請得按大臣不法者自行誅文皇帝曰臣不密則失身卿慎戒哉後竟以此得罪初文皇帝賜群臣飛白書洎至登御床爭之雖翰墨雅好於人臣小心翼翼之義亦少踈矣讒言孔多豈曰無階嗟夫以文皇帝之納諫寶賢而不免也危言亦不難哉余按內籍見衣食縣官者萬二千七百人此皆馮城社詭神奸以血食元元者外廷安可問太

吏拱手如小臣何幸 天子神聖操紀法凜凜不
爾何無漢唐二季之憂趙氏有宋苗裔而先生之
宗五服之親蓋鮮先生生而孤母夫人誓師撫之
以有立先生長而娶孫夫人以孝聞一貫異日嘗
為節孝序紀之而先生之篤學礪行一貫尤少而
服膺以為難今給事君大節又如此芝有為芳醴
有為香源本之所漸遠哉夫世人黃鮐項領不少
獨操槩可永代如先生父子豈不希覲是故余之
所為先生壽者不以七袞以此

張太僕序

使有良田廣宅背山臨流溝池可以供漁釣杯杓
可以合賓友談老氏之玄言彈南風之雅操則無
羨于帝王之門斯仲氏之志也余心希之雖然請
更其辭可乎使有慙主負宸淑輔推轂妙譽升騰
雋僚同服仰接飛龍之雲俯蔭游鳳之林植根芳
苑布英明廷匠閭闔而獨構酌大斗而樂豈踟蹰
皇塗游戲泰階叢勲名於竹素參遐躅於夔契此
莘野之所投耜而渭濱之由罷緡也若夫時儉而

機易事違而道諧操計倪良平之籌幕中黃育獲
之材折衝疆場威稜夷裔雷震虎步炎炳海沃摅
金書于天府貽談士之口實斯亦丈夫之快矣豈
羨赴枯槁之淵娛泉石之細哉夫并介無常遭時
設義靈結偉立必有所發不碩之為勲業即華之
為文章不流之為利澤即永之為壽命是知神僊
廼豪俠之尤名碩即嘉遯之最紛綸異跡諒同一
揆互引典文輒自高賞未始遁於大觀之致也不
然呂叟入秦及關而歎梁生造越登岳長謠彼將

超意遠覽遐舉極蹈之務為而惡能無槩又況其
他乎會稽張公懷竒穎之略登承明之版駮厯中
外十有餘載倦而請息授老鑑湖經營別業題曰
鏡波之館自為文記之余睹而異焉辛未春令子
魁天下明年歲滿六袞公所造楚中士十數輩感
驥群之異盼嘉龍門之共躡星嶽非遠岡陵可領
於是焉命余以文遙上觴焉余謂尚子婚嫁要五
嶽之往文成胙土踐穀城之信致至則返是曰復
命矧夫側翅天宇肆口世味既遭廻而不試且連

蜷以自適休哉鏡波之作魚鳥為鄰擊空猗以濯
天歌正音而瀟灑斯所謂遠氏可卷而范子遣鳥
兔之累者也始公蜚聲中翰歷官儀曹陵厲霄漢
雲龍變矣既而握文衡於全楚多士育其菁莪揚
武績于鬼方夷獠屈于干羽無試不奇非曰奉法
循理而已也鬱而不竟憂則違之然令子邁會風
雲縱轡詞苑斯家駒之千里池鳳之一毛可不謂
能世其官者乎天祚明德不於其身於其子孫而
其報人也不報其人報其人之天公方將跨天池

友造化食湯谷飲西海與道周始游年無窮而今
子挾風霜依日月異時者襄潤絲綸拯龜區宗
償公之所未足而出其有餘未艾也然則并介之
節斯兩之矣若是雖與喬松等年自然齊光邈無
儔而獨立表維嶽以稱尊可也庸有涯哉